

# **Landesbibliothek Oldenburg**

## **Digitalisierung von Drucken**

Gretchen Grosser: Iek mai so aiske jadden Bouke liede

*Gretchen Grosser*

## Iek mai so aiske jadden Bouke liede

Älke Jiehr is die 23. April die „Welttag des Buches“

In n'Härst fon dät Jiehr 1995 häd ju UNESCO dän 23. April tou'n „Welttag des Buches“ moaked. Düt Doatum häd een loange Tradition. Al in do twintiger Jiehre fon dät foarge Jiehrhunnert wuden in Katalonien Bouke un Rousen ferschoankt un Bouke-Foulksfäste mäd Lesungen un Musik organisiert. Fon 1931 an is düsse Dai an 23. April, dän Noomendai fon St. Georg, un juust an düssen Dai, fergeene Jiehr, kreech iek fon dän NDR dät froaie Bouk: „Mein Kriegsende“, mäd n'loangen Bräif tousoant. Iek hiede deer n'Geschichte waistjuurt uur dät Kriegsende bie uus. Mien Geschichte is wäil nit mee apnuumen wuden, uumdät ju nit „ergreifend“ nouch waas. Mie kon me oaber nit blieder moakje, as wan iek wät tou Leesen schoankt kriege.

Wail iek so jadden leese, meeene iek fonsäärm, dät uur Ljude uk Spoas an Bouke hääbe. Man iek moaste uk al fääststaale, dät dät loange nit so is. Anni hiede iek moal n'Bouk meebroacht, umdät ju mie moormals in hiere Auto meenumen hiede. Leeter täiwde iek smoals ap hiere Reaktion, man ju koom nit. Do moaste iek hier einfach frägje, wo hier dät Bouk fon Wilhelmine Siefkes „Keerlke“ dan gefaalen häd. Anni meende: „Iek hääbe in min ganse Lieuwend nit moal een Bouk leesen.“ Dät kon iek nit ferstounde. „Nit een Bouk“, kwaad ju, touminst ju Bibel moaste ju ja wäil leesen hääbe, dät maastkoopede Bouk mäd so feine Geschichten! Iek leeuwe oaber uk, dät ju Bibel dät Bouk is, wät am minsten leesen wät.

Wo wieren wie dan wäil wies wuden, wät inne Hitler-Tied aal so geböard is, wan dät neen Bouke roate! Inne Skoule, un in Huus al loange nit, wude uus wät fertäld. Wät goud, dät wie uus dät aal anleese konnen. Deerruur hääbe wie knu uk in'Kring uur boald. Iek meende: „Wan wie dän Krieg wonnen hieden, dan roate dät bie uus neen Behinderte moor, do hiede Hitler aal doodspritsje of fergasje lät. Uut Hollen is do uk een littjet Wucht doodmoaket wuden.“ „Noa, Gretchen, nu spinnst du, dät Littje is an Lungenentzündung stuurwen. Ju Familie



häd deeruur so Bescheed kriegen“, remänterde Anni. Helga meende deerap: „Gretchen häd gjucht, alleenich in Hadamar sunt so anne 10.000 Moansken mordet wuden. Dät kumt deerfon, dät jie nit leese, dan wiete jie uk ful nit!“

*Gretchen Grosser*

## „Iek wäide maal“ skäl me nit kweede

Sundeeges fraue wie uus altied ap „Bingo“. Uum fieuw Uure duurt uus naan Besäik ure Dräppel kuume. Dan hääbe wie neen Tied! Iek kiekje bloot, wan wie uk Loose appe Disk lääsen hääbe. Uurs moakede mie dät naan Spoas. Deeruum koopd min Mon of uus Harald älke Wieke twoo Loose. Wonnen hääbe wie bit nu niks, oaber dät kude daach moal weese. Dan wüül iek säärm an lfoosten, dät iek in dän Möbel- of Götjen-Winkel foar maastieds 2.000,- Euro ienkoopje duurt. Mon, dät waas wät! Foardäm moaste dan oaber eerst dät Klooderschap bie uus uutrüümt wäide, uumdät deer wät Näies ounkuume kon. Wie bee konnen ja niks wächsmiete.

Wan iek winne, wol iek oaber nit ap Raise gunge. Wägen mien Flöate inne Strilte kon iek dät nu nit moor. Bloot ju Foahrt mäd Skip appe Donau läite iek mie noch gefalle. Lääsden Sundai ruup een Wieuwmoanske, dät „Bingo“ hiede un een groote Raise wonnen hiede, an't Telefon luud uut: „Ich werde verrückt!“ Wan mie dät so gunge skuul, un iek kuud uumsunst ätter Tunesien fljooge of me appe Donau skipperje, dan wol iek foardäm oaber nit deeruum maal wäide. Dan mout iek ja uursannewaine wai, un kon ju Raise ja so un so nit antreede. Thürnau ferskräkke sik uk uur dän fälle Utfall un wonskede dät Moanske faine Raise un dät ju nit wuddelk foardäm verrückt wät.

Dät wät so oafter uunuurlait so uunferwoars kweeden: Iek wäide maal. Uus Bääsjemäame häd uus Baidene un uk groote Ljude altied kweeden, wan ju dän Utsprök fon wäl heerde: „Dät mouten jie nummer kweede! Man wät nit maal, wan me maal wäide wol! Dät is gans läip, wan me fon't Paad ouwe is. Deeruum skäl me sik dät nit wonskje!“

